

## EPESO

Dini ghi n:ii ngê Póól Njedusalem mgîmî ngópu, kóté kalê ngópu, Lóma lede knî y:oo Lóma ñuw:o ngópu, mbwa k:oo y:i doon:aa kwo. (Dpodo 28) Yi ngwo ala pweepwee pee y:i a d:êê ngê, Yesu u yoo knî ye dy:ââ ngê, yélini Esiya Wee u kwo p:aani p:aani dn̄ya a kwo. Nmînê nmo ala pweepwee pee u pi Epeso, mu kópu u d̄y:o Esiya Wee u kwo p:aani n:ii u pi ndîi, Epeso.

<sup>1</sup> Nê Póól, Chóó Lémi ngê a ngmidi noo, Yesu Kédisu u dyépi ngê a pyódu noo. Yélini Yesu Kédisu ka dpodombiy:e myenmyinê kêlîmî té, ala pweepwee pee nmye nînê dyede. \*

<sup>2</sup> Nmî Mî Chóó Lémi, nmî Lémi Yesu Kédisu u k:ii, dny:oo a ngêêpî nmyo, mb:aamb:aa ngê nmye myedny:oo a vyuwo.

### *Póól ngê nmî Mî u ngwo doo kwunokwuno*

<sup>3</sup> Nmî Yâpwo ndêndê kwunokwuno koo, pini n:ii nmî Lémi Yesu Kédisu u Mî. Yi pini mye nmî Mî, yinê a ngmidi nmoo, Yesu Kédisu u k:ii ngmidi ngê a pyódu nmoo. Nmî ghê dmi wêdêwêdê kígha u l:êê d̄y:o mb:aamb:aa ngê a yeede nmoo, kópu mb:aa nmo d̄pêngmê wópu ngê.

<sup>4</sup> Dyámê pê ghêlî d̄pêngê l:âmo ngê, u ngwo a ngmidi nmoo, apê, Yi dyââpe anî pwaa té, a tp:ee u k:ii ngmidi ngê wanî pyódu té, a yoo mb:aa ngê wanî pyódu té, mb:aamb:aa ngê a ngîma adnyin:aa ya. \*

\* **1:1:** Dpodo 18:19–20:38

\* **1:4:** Njon 15:16; 2 Tes 2:13; Epeso

<sup>5</sup> Nyââ, yi ngwo a ngmidi nmoo, nmî nuu ghi dmi nódo doo a ya. Dini ghi n:ii ngê nmî yikî dmi Yesu Kédisu u pwo ghay wo, nmî Mî ngê a lama nmoo, tp:oo módó tp:oo mââ ngê a pyódu nmoo, mu kópu u dîy:o vyîlo yi kópu u yi u ngwo yidoo kwo, Nî d:uu.

<sup>6</sup> Yi kópu u l:êê dîy:o chaa kîgha koo. Kópu ndîî nmî l:êê dîy:o ngmê d:uu ngê, Tp:oo nmo a kpo, pini n:ii u nuu ghi nódo ntênê a tóó.

<sup>7</sup> Yesu Kédisu u pwo nmî yikî dmi ghay wo, nmî l:êê dîy:o pwene, u wêê ngê nmî dono chedê too, Setan kwulo u ngwo a pwaa nmoo. \*

<sup>8-9</sup> Nkéli kópu nmî l:êê dîy:o yi d:uu ngê. Yi kópu chóó wunê a vyu, chóó u nuw:o ndîî mbêmê pi knî ye a ngmo ngê. Ala ngwo yi kópu nmî lama kêdê kwolo.

<sup>10</sup> Nmî lama ka tóó, nmî Mî ngê Yesu Kédisu tpile yintómu yi kada a kââ. Tpileni mbóó p:uu a pyede, myenté tpileni dyámê mbêmê a pyede, yi kada pini ngê dê pyódu.

<sup>11</sup> Yi kópu yilî nmî Mî ngê wunê a vyi too, yi ngwo myedê ngmidi nmoo. Kópuni dpî vyi, ntênê dpî d:uu.

<sup>12</sup> A ngmidi nmoo, mu kópu u dîy:o pi yintómu knî y:oo nmî l:êê dîy:o nmî Mî pîdny:oo chaa kîgha. Nyââ, yi kópu u l:êê dîy:o a ngmidi nmoo, Yesu Kédisu u yoo vy:o mwiyé a kaa nmoo, u ngwo nmo t:âât:ââ.

<sup>13</sup> Myenté dini ghi n:ii ngê nmî Mbwámê p:uu kópu mb:aa nmyi ny:ee ngópu, u kwo nmyi kélímî mbê dniye, Chóó Lémi ngê u l:ii nmyi gha vy:o t:ângo. Yi l:ii, chóó u Ghê Dmi. Yi ghéni dmi p:uu

---

\* **1:7:** Epeso 2:7

wunê ala kópu a vvu, apê, Yélini a tp:ee ka adnyi kélímî, a Ghê Dmi yi mênê wanî yé. \*

14 Pi ngê dy:âma ndîi ntee dpî y:oo, nmî Mî ngê u Ghê Dmi yinté nmî mênê yó. Yi kópu u l:êê dîy:o nmî lama ka tóó, dîyo ntênê wa ngeee nmo, kóó k:oo wa kaa nmo. Yi kópu u l:êê dîy:o pi knî y:oo pîdny:oo chaa kîgha, u pi ndîi ngê paa pyódu y:e. \*

*Póól Yesu u yoo yi l:êê dîy:o ntee doo ngêpê*

15 A tîdê mbwó yoo, kópu mb:aa nmyi p:uu ngmênê nyongo. A lama ka tóó, nmî Lémi Yesu ka ntênê nmye kélímî té, u yoo yi nuu ghi dmi nmyi nódo mye tóó. \*

16 Dye ghi yintómu nmî Mî nmyi l:êê dîy:o n:aa kwunokwuno ngê, u kwunokwuno d:oonngê yó. Nmyi l:êê dîy:o myenîné ngêpê yédi.

17 U ya a nga a kwo, Nmî Lémi Yesu Kédisu u Yâpwo, Chóó Lémi, pini n:ii u pi ndîi, myenté pini n:ii nmî Mî, vyîlo yi yâpwo ngê choo a ngêêpî nmyo. U ya a nga a kwo, U Ghê Dmi ngê nmyi nuw:o dmi a népwi téne, u kópu yilî nmye myedê kêma téne, Chóó Lémi nmyi lama u ngwo wa yââ.

18 Nyââ, u ya a nga a kwo, Chóó Lémi nmyi lama choo ya, ala kópu nmyi lama myechoo ya, wunê a ngmîdi nmyoo, daawa dóó nmyo, kóó k:oo ntênê wa kaa nmyo. U ya a nga mye kwo, Ala kópu nmyi lama chóó a ya, yélini yi k:li Yesu ka nmo kélímî té, kóó k:oo wa kaa nmo, nmî pi dmi ndîi ngê wa pyódu té, nmî ya d:ud:umbiy:e mb:aamb:aa ngê wamî pyódu.

---

\* 1:13: Epeso 4:30      \* 1:14: 2 Kódin 1:22      \* 1:15: Kîlosa 1:4-11

19 U ya a nga mye kwo, Ala kópu nmyi lama choo a ya, nmî Mî u wêdêwêdê n:ii nmî mênê a tóó, mu daa mu tp:ook:omo.

20 Vyílo yi wêdêwêdê mbêmê nmî Mî ngê Yesu Kédisu kpêênî a pyidu ngê, mbóó p:uu kmungo, u ché p:ââ pee ngê pyódu ngê. \*

21 U pi ndîi ngê pyódu ngê, u wêdêwêdê ndîi ngê mye pyódu ngê. Kada pini yintómu, king yintómu, yâpwo ghi yintómu, kmêna mbwee yintómu, myenté nkwépi yintómu yi pi dmi tédê dé, yi wêdêwêdê mye tédê, ngmênê Yesu Kédisu u wêdêwêdê yi ndîi. Doo u ntââ pi ngmê ngê Yesu Kédisu ala ngwo d:uudpî t:ee kwolo, mu dini ghi ngê myedaawa t:ee kwolo, Yesu Kédisu mu ngmîdi u pi yi ndîi, u wêdêwêdê mye ndîi. \*

22 Tpile yilí yintómu nmî Mî ngê Yesu Kédisu yu yodo u maknopwo yé too, nmî l:êê dîy:o tpile yintómu yi kada pini ngê pyódu ngê. \*

23 Nmî kada pini ngê mye tóó, nmî mbodo ngê a tóó, nmo, kóó kpâlî dé. Yinê a mbêpê kîgha nmo, u dpodo yuno dódó, myenté tpile yilí yintómu yinê a yenê té.

## 2

### *Nmî Mî ngê kamî ngê u ngwo pyódu nmoo*

1 Mbwee ntóó ngê dnye ntee daa nyêmî ngê, yinté tpile ngê nmyee a ya, nmî Mî u dnye dênmyee a nyêmî, myenmyee a dono. \*

2 Yi ngwo mgídî u yoo vy:o nmyee a kwo, dono u maa p:uu nmyee a paa. Kmêna yoo yi kada pini u

\* **1:20:** Hipîlu 1:3,13      \* **1:21:** Kîlosa 2:15; Pilipay 2:9-10      \* **1:22:**

Kîlosa 1:18      \* **2:1:** Kîlosa 2:13

dnye yinmyee a nyêmî. Yoo dono knî y:oo yi pini u dnye ala ngwo myeye nyêmî ngmê. \*

<sup>3</sup> Nmo yintómu wunê yinté kînnee a ya, nmî chóo nmî pono nnee a vyápê, kópuni u yi nmo dpîmo a kwo, nmîmo d:uud:uu dé. Dyámê mbêmê pi yintómu knî yi k:ii nmî kpadakpada u maa p:uu nnee a kwo. \*

<sup>4</sup> Ngmênê Chóo Lémi ka ntênê nmî ch:anê dniye, nmî nuu ghi dmi nódo a tóo.

<sup>5</sup> Dini ghi n:ii ngê mbwee ntóo ntee tpile ngê nnee a ya, u dnye dênnee a nyêmî, Yesu Kédisu kpêênî ntee a pyidu ngê, yinté myedé pyidu nmo, ghê kamî nmo a kpo. (U módó yeedeyeede mbêmê kóo k:oo kaa nmyoo.)

<sup>6</sup> Nyââ, Yesu Kédisu u k:ii a kââdî nmo, mbóo p:uu ntee kmungo, kmêna mbwee nkwépi knî yi pwo nmî pi dmi yinté mye kmungo. \*

<sup>7</sup> U kwo nmo ch:anê dniye, Yesu Kédisu ka a kââdî nmo. Dnyinté daa yeede nmo, kópu ndîi nmî l:êê dîy:o ngmê d:uu ngê. U yi u ngwo doo kwo, Pi knî y:oo yi kópu m:uu y:e, dye ghi yintómu yi lama pîchoo ya, chedê ngê daawa pyódu. \*

<sup>8-9</sup> Nyââ, nmî Mî ngê a yeede nmyoo, dini ghi n:ii ngê Yesu Kédisu ka nmyi kêlímî mbê dniye, kóo k:oo kaa nmyoo. Daa kópuni nmyee a d:uud:uu dé yi l:êê dîy:o kóo k:oo kaa nmyoo, ngmênê Chóo Lémi ngê módó a yeede nmyoo, doo u ntââ nmyi chóo nmyi pi dmi daanmyi kmîmî dé. \*

<sup>10</sup> Nmî Mî ngê kamî ngê yinê a pyódu nmo, Yesu Kédisu u k:ii ngmîdi ngê pyódu nmo, mu kópu u

\* **2:2:** Epeso 6:12    \* **2:3:** Taitas 3:3    \* **2:6:** Lóma 6:8    \* **2:7:** Lóma 2:4    \* **2:8-9:** Lóma 3:24; 2 Tim 1:9; Taitas 3:5

dîy:o u yi u ngwo doo kwo, A tp:ee u yoo yi l:êê ghi dmi mb:aamb:aa ngê paa pyaa dniye, kópu mb:aa yilí pîdny:oo d:uud:uu. Yi kópu mb:aa ló dini a m:uu too. \*

*Yesu ngê Nju tpémi, kn:aa yéli yi k:ii ngmidi ngê u ngwo pyódu too*

<sup>11</sup> A tîdê mbwó yoo, nmyi vy:o yélini daa Nju tpémi, nmye nîné danê. Ntee nmyee a ya, yi kópu p:uu dmyinê nuw:o. Nmo Nju tpémi, nmí mî kní y:oo Chóó Lémi u l:ii nmî p:uu a t:ee ngópu. Daa nmí nuu u yoo ngê nmyee a kwo, mu kópu u dîy:o yi l:ii nmyi p:uu dèpê t:ee ngópu.

<sup>12</sup> Yi ngwo Yesu Kédisu dênmyee a t:âât:ââ, yélini Chóó Lémi ngê a ngmidi ngê, yi yéli yi vy:o dênmyee a kwo. Chóó Lémi ngê wunê nmî kn:ââ yoo u kwo a kââdí too, yepê, Nmyi yoo kní ye mb:aamb:aa ngê ana a vyyuwo. Ngmênê nmyo kuu dé, kóó kuwa nmyee a kwo. Mgidí u yoo vy:o nmyee a kwo, Chóó Lémi nmyi lama dèpwo a ya, nmí Mbwámê dênmyee a t:âât:ââ. \*

<sup>13</sup> Yi ngwo kóó kuwa nmyee a kwo, ngmênê nmyi yikí dmi Yesu Kédisu u pwo ghay wo, nmyi l:êê dîy:o mye pwene, ala ngwo kóó k:oo nmye wee.

<sup>14</sup> Nmí kèlí ghê d:êê yiné a y:ângo, numo ka diya n:ii nmee a kîgha, yi kópu chedê ngê, numo ka a kââdí nmoo, yoo ngmidi ngê pyódu nmoo. \*

<sup>15</sup> Dini ghi n:ii ngê pwene, Nju tpémi yi dèêpí kópu yintómu yi d:aa dmi a kââdí ngê, yoo miyó dé u kwo a kââdí doo, yoo ngmidi ngê pyódu nmoo.

---

\* **2:10:** Taitas 2:14      \* **2:12:** Lóma 9:4; 1 Tes 4:13      \* **2:14:** Kílosa 1:20; 1 Kódin 12:13

16 Nyââ, dini ghi n:ii ngê kîdosi ñedê pwene, numo ka diya n:ii nmee a kîgha, yi kópu chedê ngê, numo ka a kââdí nmoo, Chóó Lémi ka yoo mb:aa ngê pyódu nmoo, u kwo myedê kââdí nmoo. \*

17 Dini ghi n:ii ngê dyámê mbêmê a loo, u maa nkîgh:ê nmee a kwo, ngmênê u maa nkîgh:ê dênmyee a kwo. Dini ghi n:ii ngê pwene, Chóó Lémi ka nipi a kââdí nmoo.

18 Nyââ, yoo ngmidi ngê pyódu nmoo, nmî Mî u Ghê Dmi nmî mênê yó, nmî Mî ka maa komo yiné kpêmî ngê. \*

19 Wunê nmî yoo vy:o dênmyee a kwo, pi my:oo ngê nmyee a ya, ngmênê ala ngwo nmo p:aa ngmidi tpémi, Chóó Lémi u yoo vy:o nipi nmo wee, tp:oo módó tp:oo mââ ngê dê pyódu nmo.

20 Myenté u ngomo ntee tpile ngê dê pyódu nmo. U komo kapî pyu knî y:oo, Yesu u dyépi yoo yi k:ii, ngomo k:ââ pââ dyuu kaa tumo, ngomo pywuu l:âmo ngópu. Yesu Kédisu chóó pw:eni ngê a tóó. \*

21 Ngomo ch:oo yintómu yiné a tpyé. Chóó Lémi u ngomo ntee tpile ngê dê pyódu nmo, chóó nmî mênê a tóó. \*

22 Nyââ, nmî Lémi ngê yoo ngmidi ngê pyódu nmoo, dèpê kuwo nmyoo, Chóó Lémi u Ghê Dmi nmî mênê a tóó. \*

### 3

#### *Póól u dpodo p:uu u ngwo ye doo dané*

---

\* **2:16:** Kílosa 1:20,22      \* **2:18:** Epeso 3:12      \* **2:20:** Mát 16:18; 1 Kódin 3:11      \* **2:21:** 1 Kódin 3:16; Kílosa 2:19      \* **2:22:** 2 Kódin 6:16

<sup>1</sup> Nê Póól, mbwa k:oo anî kwo, mu kópu u dîy:o Yesu Kédisu ngê a dpodo kalê noo, yélini dp:ee Nju tpémi, nmye a dy:ââ noo, nmyo ntee yéli u yoo vy:o noo a kapî dé. \*

<sup>2</sup> Yi dpodo u pi nmyinê ny:ee ngópu, apii? Nmyi lama kíyedê too, Chóó Lémi ka nê ch:anê wo, nmyi l:êê dîy:o a dpodo kalê noo,

<sup>3</sup> kópuni wunê a ngmo ngê a ka myedê vyu. (Yi ngmee u kópu ala ngwo pee tp:oo nmye kîd:a d:êê. \*

<sup>4</sup> Dini ghi n:ii ngê amênmyinê kp:aa ngmê, Yesu Kédisu p:uu ngmee u kópu ntee nê w:ee ngê, yinté amyenmyinê w:ee ngmê.)

<sup>5</sup> Yi ngmee u kópu ala ngwo nmî dye ghi ngê da pywálî, nmî Lémi ngê u dyépi knî ye, u komo kapî pyu knî ye da vyi. Nyââ, nmî Lémi u Ghê Dmi mbêmê da w:ee ngmê, ngmênê n:ii knî y:oo u komo wunê dnyimo a kapî, yi ngmee u kópu dnyinté a w:ee ngópu, mgo mwââ vy:o a m:uu ngópu.

<sup>6</sup> Yi ngmee u kópu ala. Nmî Mî ngê ala kópu wunê a vyu, apê, Yoo yi l:êê dîy:o a Tp:ee wa pw:onu, wamênî pyidu, Nju tpémi, kn:aa yéli yi k:ii, numo ka yinê wa a kâádî té, yoo ngmîdi ngê wa pyódu té, a kêê k:oo nipi wa kaa té. Ala ngwo yi kópu mb:aa dmyi ny:ee ngmê, nmî Lémi u yoo vy:o dmye ghê dmi. \*

<sup>7</sup> Yi kópu mb:aa tpapê u l:êê dîy:o, nmî Mî ngê a dpodo kalê noo. Dpodo ndîi yila, u pi mye ndîi. Chóó u wêdêwêdê mbêmê u ntââ ngê a pyódu noo.

\* **3:1:** Epeso 4:1; Pilipay 1:13

\* **3:3:** Epeso 1:9; Kílosa 1:26

\* **3:6:** Epeso 2:13,19



\*

<sup>8</sup> K:omo tpile nmî Lémi u yoo vy:o dênoo a kwo, ngmênê yinë a ngmidi noo, dpodoni u pi ndîi, yi dpodo nédê a kaa noo, a ka pê, Yélini daa Nju tpémi, a pi ye chin:aa tpapê. Ala ngwo yi dpodo nédê anî kwo, pi knî ye yenîmo, Yesu Kédisu ka nmî ch:anê dniye, ntênê nmo wunê vyuwo yédi, doo u ntâa yi kópu mb:aa yilî daanmî chedê. \*

<sup>9</sup> Yi dpodo tédê Chóó Lémi u ngmee u kópu kwédi pi knî ye nîmo pywálîpywálî ngê. Dyámê pê pini n:ii ngê l:âmo ngê, yi tumu kópu yi ngwo a ngmo ngê. \*

<sup>10</sup> U yi u ngwo doo kwo, Yesu u yoo knî y:oo yi tumu kópu kwédi y:oo paan:aa pywálî y:e, mbóó p:uu yélini kada a wee, enjel yoo yi k:ii, yi tumu kópu yi lama paa yaa we. Yi tumu kópu u mênê Chóó Lémi u nuw:o ndîi u kópu yintómu a pyede.

<sup>11</sup> Yi kópu wunê a nuw:o kwólu, ala ngwo nmî dye ghi ngê nmî Lémi Yesu Kédisu ngê yi kópu dê d:uu.

<sup>12</sup> Yélini yi k:ii u kwo nmo kélîmî té, Chóó Lémi ka nmî maa komo yinë kpêmî ngê. Nkîngê ngê kêê daanmo t:oo, yi máádi u ngwo anmî kwolo. \*

<sup>13</sup> Ala ngwo pi knî ye myenamê nkîngê. Dononi nîné vyîmî, p:uu nuw:o ngê kêê nangê t:oo, k:omo tpile ngê nmye choo ya, mu kópu u díy:o a dpodo u l:êê díy:o nmyi ya mb:aamb:aa ngê amî pyódu. \*

*Póól Esiya Wee u kwo tpémi yi l:êê díy:o u ngwo doo ngêpê*

---

\* **3:7:** Kílosa 1:25      \* **3:8:** 1 Kódin 15:9-10      \* **3:9:** Kílosa 1:29

\* **3:12:** Epeso 2:18; Hipîlu 4:16      \* **3:13:** 2 Tim 2:10

14 A tîdê mbwó yoo, nmyi l:êê dîy:o nmî Mî ka n:aa ngêpê yédi.

15 Yinê a l:âmo nmoo, mbóó p:uu yélini wunê pyede, mye l:âmo too, ntênê nmo wunê vyyuwo yédi.

16 U pi ndîi, u wêdêwêdê mye ndîi. U ya a nga a kwo, U Ghê Dmi ngê nmyi gha dmi a wêdêwêdê kalê ngê.

17 Nmyi kêlîmî u l:êê dîy:o Yesu Kédisu nmyi mênê pîchoo ya. U ya a nga a kwo, Nmî Mî u nuu ghi nmyi nódo choo ya, yoo yi nuu ghi dmi nmyi nódo myedny:oo ya, yi kópu ngê yinê choo mbêpê kîgha nmyo. \*

18 U ya a nga a kwo, Nmî Lémi u yoo yintómu knî yi k:ii, ala kópu nmyi lama pîchoo ya, Yesu Kédisu nódo nmyi nuu ghi dmi ntênê a tóó, daa kede wo, nmyi l:êê dîy:o doo mgínî vyímî, u pi ka vyyuwo mu daa mu tp:ook:omo, u dí anyi wunê tóó.

19 Doo u ntââ yi kópu nmî lama d:ud:umbiy:e daawa yââ, ngmênê u ya a nga a kwo, Nmyi lama pîchoo ya, nmî Mî ntee a tóó, yinté paa pyaa dmyeno.

20 Nmî Mî chaa kîgha koo. Wêdêwêdêni nmî mênê a dpodo, nmî Mî u wêdêwêdê ye tóó. Ló kópu u kwo ngmanmî dmyinê, ló kópu p:uu nmî nuw:o dmi adî kwo, u ntââ nmo wa a d:uu té, myenté kópuni yi kópu dé yi pwo a pyede, u ntââ nmo amyedê d:uu té. \*

21 Yélini yi k:ii Yesu Kédisu ka nmo kêlîmî té, dye ghi yintómu nmî Mî chaa kîgha koo, chedê ngê kîngê pyódu. Ndê kópu yila.

\* **3:17:** Kílosa 2:7; Njon 14:23      \* **3:20:** Kílosa 1:29

## 4

### *Yesu ngê u kwo u ngwo a kââdî nmoo*

<sup>1</sup> A tîdê mbwó yoo, nmî Lémi p:uu dpodo u l:êê dîy:o, mbwa k:oo al:ii anîné kwo. Yi kópu u l:êê dîy:o nîné kwunokwuno nmyo, máádini p:uu nmî Mî ngê kaa nmyoo, yi máádi mb:aamb:aa ngê dmyiné kîgha. \*

<sup>2</sup> Dye ghi yintómu kîdmyengê lémilémi, pi knî ye nuw:o ngê dmyiné mbumu, límîlímî ngê kîdmyengê nod:enod:e. Pi límîlímî ngê nangmê kée, nmyi nuu ghi dmi numo nódo dny:oo ya. \*

<sup>3</sup> Nmî Mî u Ghê Dmi ngê numo ka a kââdî nmyoo, numo ka mb:aamb:aa ngê dmyiné ya, kîdmyengê numo kée t:oo. \*

<sup>4</sup> Yesu Kédisu ngê numo ka a kââdî nmoo, nmî mbodo ngê a tóó, nmo kóó kpâlî dé, u Ghê Dmi mu ngmidi nmî mênê ye tóó. Kópu mu ngmidi yinmye t:âât:ââ ngmê, n:ii ngê a ngmidi nmyoo, kóó k:oo wa kaa nmyo. \*

<sup>5</sup> Nmî Lémi mu ngmidi, kn:aa pini ka dpîno kêlímî té, vyîlo u pi mbêmê mbápitisîm kalê nmoo, daa kn:aa pini u pi mbêmê.

<sup>6</sup> Nmo yintómu nmî Mî mu ngmidi, Chóó Lémi. Yinê a yenê nmo, nmî mênê a tóó, u wêdêwêdê mbêmê nmo dpodo nyédi.

<sup>7</sup> Nyââ, nmî mbodo mu ngmidi, ngmênê nmî dpodo u mo u mo dé, Yesu Kédisu ngê chóó u nuw:o mbêmê nmî dpodo nédê dpodo nédê kaa nmoo. Yi dpodo knî yi l:êê dîy:o u ntââ ngê pyódu nmoo. \*

---

\* **4:1:** Kílosa 1:10    \* **4:2:** Kílosa 3:12-13    \* **4:3:** Lóma 12:16-18; 1 Pita 3:8    \* **4:4:** 1 Kódin 12:12-13    \* **4:7:** Lóma 12:3,6

8 Yinté kópu nmî Mî u puku yedê alanté a tóó,  
 Yélini nmî Lémi p:uu dnye d:uu,  
 yu yodo u maknopwo yé too,  
 tââ u ngwo kee wo,  
 u ngwo a yeede nmoo. \*

9 Tââ u ngwo kee wo, u kakêmê nmye nînê  
 chámêchámê. U nt:u kópu alanté. Mwiyémwiyé  
 dyámê mbêmê a loo, p:ââ y:i mê ghêpê wo.

10 Nyââ, pini n:i a ghêpê wo, vyîlo yi pini mbóó  
 p:uu mêyi kee wo, nmî Mî u nkîgh:ê mî yaa wo,  
 mbóó dyámê yi mbêmê tpile yilí yintómu yiné a  
 yenê té.

11 Yinê a yeede nmoo, nmî dpodo dpodo nmo a  
 kpo, yi dpodo dé yi l:êê dîy:o u ntââ ngê mye pyódu  
 nmoo. Knî ngmê u dyépi ngê pyódu too, knî ngmê  
 u komo kapî pyu ngê pyódu too, knî ngmê u kópu  
 y:eñey:eñe pyu ngê pyódu too, knî ngmê kada pini  
 ngê pyódu too, knî ngmê dêêpî pyu ngê pyódu too.  
 \*

12 U yi u ngwo a kwo, A yoo yintómu wédêwédê  
 ngê pyaa dniye, a dpodo u ntââ ngê pyaa dniye,  
 a l:êê ghi dmi ntee a tóó, yi l:êê ghi dmi yinté paa  
 pyaa dniye. \*

13 Yi dpodo knî yi mbêmê nmî nuw:o dmi ngmidi  
 ngê wa pyódu, Chóó Lémi Tp:oo ka mb:aamb:aa  
 ngê anmî kêlîmî, nmî lama ntênê wa yââ. Tp:ee  
 ntee dpîk:aa, mââwe ngê dpî pyódu, yinté anmî kaa  
 dmi. Yesu Kédisu ntee a tóó, yinté anmî pyaa dmi.  
 \*

\* 4:8: Psalm 68:18 \* 4:11: 1 Kódin 12:28 \* 4:12: 1 Kódin 14:12

\* 4:13: Kílosa 1:28

14 U yi u ngwo daa kwo, A yoo tp:ee ntee tpile ngê dny:oo ya, u yi u ngwo myedaa kwo, Yópu ng:oo ntee tpile ngê dny:oo ya. U yi u ngwo daa kwo, Pi dódó pyu knî y:oo dny:oo dódó dé, yi nuw:o dmi miyó miyó ngê dny:oo pyépi dé. \*

15 A tîdê mbwó yoo, nmî nuu ghi dmi numo nódo dny:oo ya, numo ka paa ndê danê kmêle, nmî mbodo Yesu Kédisu ntee a tóó, yinté pyaa kmêle. \*

16 Nmî Mî ngê pi p:uu tpile yintómu ntee a kââdí too, Yesu Kédisu ka yinté a kââdí nmoo, numo ka myedê kââdí nmoo. Nmî dpodo dpodo nmo a kpo, yi dpodo knî yi mbêmê nmo numo ngêêpî nyédi, nmî Lémi ntee a tóó, yinté nmo numo pyépi nyédi, mu kópu u dîy:o nmî nuu ghi dmi numo nódo a tóó. \*

*L:êê ghi dono kéké, maa mb:aa u kîgha*

17 Nmî Lémi u pi ngê kópu nmye munînê tpaépê, dpó ny:ee yó. Yélini y:oo nmî Lémi daa chââchââ ngmê, yi nt:anê mênangmê yââ. Yi nuw:o dmi k:omo tpile knî yi p:uu a kwo. \*

18 Yi nuw:o dmi mgîdí vy:o a mbêpê, yi ngópu dmi nkoko tumo, nmî Lémi u kópu dé yi lama daa pyede. Ghéni n:ii kamî nmî Mî ngê nmo a kpo, dêpê pyw:ee ngópu.

19 Dye ghi yintómu a dono nyédi, dono dyêêdí daa ngmîdi a d:uud:uu ngópu, yi gha dmi tupwótupwó dé, ngmênê mywene y:e daa kwo yédi.

20 Yesu Kédisu u kópu knî yi p:uu yinté kópu dpîp:e ndê ngópu.

\* 4:14: 1 Kódin 14:20 \* 4:15: Epeso 4:25 \* 4:16: Kîlosa 2:19

\* 4:17: Lóma 1:21

21 A lama ka tóó, dini ghi n:ii ngê u pi nmyi ny:ee ngópu, u yoo vy:o nmyi ghê dniye, pi knî y:oo Yesu u ndê kópu dyuu nmye vyi tumo.

22 Nmyi nuw:o mbwee knî y:oo maa dono p:uu dnyimo a mbêpê kîgha nmyo, dnyimo a dódó nmyo, u l:êê dîy:o dono u yi nmye dpîmo a kwo. Yi máádi u dî ndiya. Ala ngwo nmyi nuw:o mbwee dpî kée tóó. \*

23 Nmyi nuw:o dmi kamî ngê dny:oo ya, nmyi gha dmi kamî ngê myedny:oo ya.

24 Pi ngê kpídî mbwee ntee dpî kée, kpídî kamî u mbwo dpî t:oo, nmyi nuw:o mbwee dmi yinté dpî kée tóó, nuw:o kamî p:uu dmyinê mbêpê. Nmî Mî ntee a tóó, nmyi nuw:o kamî dmi yinté yinê dpo pyódu té. Nyââ, yi nuw:o kamî p:uu dmyinê mbêpê, dmyinê mb:aamb:aa, nmî Mî ntee a tóó, yinté ndêndê ngê dmyinê ya.

25 Yi kópu u l:êê dîy:o noko kîdmyengê k:omodanê, numo ka dmyinê ndê danê, mu kópu u dîy:o yoo ngmidi ngê nmî pyaa dniye. \*

26 Pi ngmê ka ngmêdmye nod:e knomomê, dono nangmê d:uu, nod:enod:e ngê kâádî nmye kîngê ghî.

27 Nod:enod:e têdê dye ghi daadî ngê nangê pyódu, kminté Setan ngê wa dóó nmyo, ntââ anmyinê vy:ee ngmê.

28 Nmyi vy:o pini n:ii kpáápi ngê doo a ya, kpaa ngê kêê kédêm:uungê t:oo, chóó kóó dê y:e choo dpodo, dpodombiy:e choo dpodo, pinté yoo choo yeedeede dé. \*

---

\* 4:22: Kílosa 3:9-10; Lóma 12:2      \* 4:25: Epeso 4:15      \* 4:28: Dpodo 20:35

29 Danêmbum têdê dono kópu nmyi kwo kîdangmê pwii. Kópu mb:aa yidmyinê tpaépê dé, yoo u ngwo dmyinê ngêépî dé, yi kèlîmî wêdêwêdê ngê u ngwo paa pyaa dniye. \*

30 Nmî Mî u Ghê Dmi nangê mywenemywene kwolo. Dini ghi n:ii ngê pi ngê dy:âma ndîi dpî y:oo, yoo yi lama dpî yââ, naa díyo wa kê ngmê, daawa têd:a. Nmî Mî u Ghê Dmi, dy:âma ndîi ntee tpile ngê a tóó, nmo a kpo. Yi dy:âma ndîi wanmyi diyédiyé kalê ngmê, ye naa wa têd:a, Chóó Lémi ngê kóó k:oo daamî kaa nmyo. \*

31 Kópuni nmyi nódo a kaa dniye, dpî kée tóó, kîdmyengê nuu mbumu, nod:enod:e, dnyengi, peede tpaépê, pi u pi dyede. Dono n:aam:uungê d:uu, \*

32 ngmênê noko mb:aamb:aa ngê dmyinê ya, numo ka dmyinê vwuwo, numo ka myedmyinê ch:anêch:anê. Chóó Lémi ngê Yesu Kédisu u l:êê díy:o nmyi dono yilî ntee u kuwó kée too, nmyi tîdê mbwó yoo yi dono yilî yinté nmyi kuwó myoo kée tóó, mênangmê ngî. \*

## 5

### *W:êênî u kópu dé yi d:uud:uu*

1 Nmî Mî ntee a tóó, yinté dmyinê ya, mu kópu u díy:o tp:oo módó tp:oo mââ ngê a pyódu nmyoo, nmyi nuu ghi dmi nódo a tóó.

2 Yesu Kédisu nódo nmyi nuu ghi dmi ntee a tóó, nmyi tîdê mbwó yoo yi nuu ghi dmi yinté nmyi nódo myedny:oo ya. Chóó Lémi u nuu u kópu yi

\* 4:29: Epeso 5:4; Kílosa 4:6      \* 4:30: Epeso 1:13-14      \* 4:31:

Kílosa 3:8      \* 4:32: Kílosa 3:12-13

d:uu ngê, nmî l:êê dîy:o chóochóó y:ângo, chóochóó kpêê ngê yó. \*

<sup>3</sup> Nmî Mî u yoo vy:o nmyi ghê dniye, u l:êê dîy:o kîdmyengê pyââ ti mââ ti, nmyi gha dmi tupwótupwó ngê mêtîngê pyaa dmi, tpile ndapî yi mb:aami ngê nangmê pyódu. Pi knî y:oo nmyi pi dmi yi kópu knî yi p:uu kîngmê ny:ee ngmê.

<sup>4</sup> Myenté doo u ntââ dono kópu dé nmyi kwo kîdangmê pwii, pyââ p:uu danêmbum ngê kêê nangê t:oo, yinté pi nkwitinkwiti ngê kêê mye-nangê t:oo, ngmênê nmî Mî p:ee dmyinê kwunok-wuno. \*

<sup>5</sup> Ala kópu nmyi lama choo ya, pyââ ti pyu, ó pini n:ii u gha tupwótupwó, ó tpile ndapî yi mb:aami, yinté pini nmî Mî Mupwo yi kêê k:oo daangmêwa ghê, mu kópu u dîy:o tpile ndapî yi mb:aami ngê u tpile dé u yâpwo ngê dpî pyódu té. U nuw:o u tpile knî yi p:uu a kwo yédi, nmî Mî p:uu daa kwo yédi. \*

<sup>6</sup> Pi ngê k:omodanê kópu knî yi mbêmê kîngê dóó nmyo. Yélini nmî Mî ka daa ng:aa nyédi, yinté kópu a d:uud:uu tumo, vyîlo yi kópu knî yi l:êê dîy:o wa kpada té. \*

<sup>7</sup> Yinté yéli yi vy:o nangmê ghê.

<sup>8</sup> Wunê mgîdî vy:o nmyee a kwo, ngmênê nmî Lémi ngê u kwo a kâadî nmyoo, u wo nmye pyede. Wo u yoo yi kópu dé yidmyinê d:uud:uu dé, \*

<sup>9</sup> dmyinê mb:aamb:aa, nmî Mî u nuu u kópu dé dmyinê d:uud:uu dé, pi nangmê dóó.

\* **5:2:** Nkal 2:20      \* **5:4:** Epeso 4:29      \* **5:5:** 1 Kódin 6:9-10

\* **5:6:** Lóma 1:18      \* **5:8:** Kílosa 1:13; 1 Pita 2:9



10 Nyââ, nmî Lémi u nuu u kópu dé dmyina a pyw:êmî dé, myedmyinê d:uud:uu dé. \*

11 Mgîdî u kópu knî y:oo yoo daa ngêêpî tumo, nangmê d:uu, ngmênê nmyi wuu yi kópu dono yilî yi pwo dny:oo ya, pi knî ye dmyinê kwódukwódu dé.

12 Kópuni tumutumumu a d:uud:uu tumo, mywene-mywene u kópu dé. Ala pwepwee pee yedê daané d:êê té, kminté mywene nmye amî ghê.

13 Nyââ, nmyo lam ntee tpile dé, kópu yilî yintómu yi pwo nmyi wuu dmi choo ya, pi knî y:oo u ngwo pêdê w:ee y:e, yi kópu daa mb:aamb:aa dé, dono dé. \*

14 W:êênî tpile yilî yintómu mb:aamb:aa ngê anyi m:uu té. Yi kópu u l:êê dîy:o nmî wéti ngmê k:oo ala kópu a tóó,

Yélini mbwee ntóó ntee tpile dé,  
a pii dmyeno,

Yesu Kédisu u wuu nmyi pwo wa kéé.

15 Dp:ee mgîdî u yoo, ngmênê Yesu Kédisu u wuu nmyi pwo a tóó. Yi kópu u l:êê dîy:o u maa mb:aamb:aa ngê dmyinê kîgha. Yélini yi lama nmî Lémi daa tóó, yi nt:anê mênangmê yââ, ngmênê nmî Lémi u nuw:o u pono dmyinê vyápê.

16 Ala ngwo yoo dono yi vy:o nmye wee. Módó kîdmyengê ya, ngmênê kópuni mb:aamb:aa u ntââ ngê nmye dpî pyaa dmi, dmyinê d:uud:uu dé. \*

17 Mbodo podo ngê nangmê pyódu, ngmênê nmî Lémi u nuu u kópu dé dmyina a pyw:êmî dé, myedmyinê d:uud:uu dé. \*

---

\* 5:10: Lóma 12:2 \* 5:13: Epeso 2:1 \* 5:16: Kílosa 4:5 \* 5:17: Kílosa 1:9

18 Mbwaa ndanî têtê kîdmyengê ghétighéti, yi kópu ngê wa dyênê nmyo. Ngmênê nmî Mî u Ghê Dmi nmyi mênê ntênê choo ya, yinê choo mbêpê kîgha nmyo. \*

19 Wéti n:ii nmyi lama a kîgha too, myenté wéti n:ii nmî Mî u puku yedê a pyede, myenté wéti n:ii Yesu u yoo knî y:oo ala ngwo dê vyi t:oo, yi wéti knî y:e nmî Lémi nmyi gha knî yi vy:o yinté dmyiné chaa kîgha. \*

20 Tpile yintómu knî yi l:êê dîy:o, dye ghi yintómu nmî Lémi Yesu Kédisu u pi mbêmê nmî Mî Chóó Lémi dmyiné kwunokwuno. \*

21 Numo dnye dmyiné nyêmî dé, mu kópu u dîy:o Yesu Kédisu u dnye nmye nyêmî ngmê, my:ee cháâcháâ ngmê.

*Yéé yepe yoo yi danêmbum*

22 Yepe yoo, nmî Lémi u dnye ntee nmye nyêmî ngmê, nmyi moo yoo yi dnye dmi yinté myedmyiné nyêmî dé, \*

23 mu kópu u dîy:o Yesu u yoo yi mbodo ngê ntee a tóó, mââ mye yinté, u kpâm u mbodo ngê yinté a ya yédi. Yélini yi k:ii Yesu ka nmo kélîmî té, nmî mbodo ngê pyodo, mu kópu u dîy:o nmî Mbwámê ngê mye pyodo, nmî l:êê dîy:o u ngwo pwene. \*

24 Nyââ, Yesu Kédisu u dnye ntee nmo nyêmî ngê, yepe knî y:oo dye ghi yintómu yi moo yoo yi dnye dmi yinté dny:oo nyêmî dé.

25 Yéé yoo, ala kópu a ny:ee yó. Yélini yi k:ii Yesu Kédisu ka nmo kélîmî té, nmî nuu ghi dmi

\* 5:18: Lóma 13:13; 8:6 \* 5:19: Kílosa 3:16 \* 5:20: Kílosa 3:17;

1 Tes 5:18 \* 5:22: 1 Pita 3:1 \* 5:23: 1 Kódin 11:3

nódo a tóó. Yi kópu nmî lama a tóó, mu kópu u dîy:o chóochóó nmî l:êê dîy:o y:ângo. Ntee nmo wunê vyuwo, nmyi kpâm knî ye yinté myedmyinê vyuwo, yi nuu ghi dmi nmyi nódo ntênê dny:oo ya.  
\*

<sup>26</sup> Yesu Kédisu ngê u yi doo kwo, A yoo yi dono mbwaa ngê nî ghêê té, a kópu dyuu mbêmê a kede paa nî t:ee té. \*

<sup>27</sup> U yi u ngwo a kwo, A chóó a yoo ngê nî pyódu té, yoo mb:aa ngê nî pyódu té, dyââpe yi p:uu daadî ya, dono yi mênê myedaadî ya. \*

<sup>28</sup> Mââ yoo, nmyi chóochóó nmyi nuu ghi dmi nmyi nódo ntee a tóó, nmyi kpâm yoo yi nuu ghi dmi nmyi nódo yinté myedny:oo ya. Pyââ mbodo mââ, u l:êê dîy:o n:ii u kpâm ka a vyuwo yédi, chóó u pââ ka a vyuwo yédi.

<sup>29</sup> Pi chóochóó u kwo daawa diy:a, ngmênê a mbonombono ngê, u kwo a vyuwo yédi. Myenté pi ka u kpâm kîngî diy:a, u kpâm ka mb:aamb:aa ngê choo vyuwo. Yinté Yesu Kédisu nmo wunê vyuwo yédi, \*

<sup>30</sup> nmî mbodo ngê a tóó, nmo u yoo.

<sup>31</sup> Nyââ, pini n:ii u kpâm ka a vyuwo yédi, chóó u pââ ka a vyuwo yédi, mu kópu u dîy:o puku yedê alanté a tóó,

Mââ u pye mî yi kêlê dpo pwii,

u kpâm k:ii ngmidi ngê dpî pyaa knî.

\*

---

\* **5:25:** Kîlosa 3:19      \* **5:26:** Hipîlu 10:10; Njon 15:3      \* **5:27:** 2 Kódin 11:2      \* **5:29:** 1 Kódin 12:27      \* **5:31:** Gen 2:23-24

<sup>32</sup> Yi kópu u mênê tumu kópu ndîi ngma tóó, na a ka u nt:u kópu ala, Yesu Kédisu ngê u yoo u kede paa t:ângo.

<sup>33</sup> Yi kópu u dînê mye yinté, pi ngê u kpâm u kede paa dpî t:oo, ngmidi ngê dpî pyaa knî, ntênê u kwo choo vyyuwo, myenté yi pyópu ngê u moo ntênê choo chââchââ.

## 6

### *Tp:ee dmââdîma yi kópu dyuu*

<sup>1</sup> Tp:ee dmââdîma, yélini Yesu ka nmye kêlîmî té, nmyî pye mî yoo yi dnye dmi dmyinê nyêmî dé, yi kópu vyîlo yidmyinê d:uud:uu. \*

<sup>2</sup> Puku yedê alanté a tóó,

Nmyi pye mî yoo dmyinê chââchââ dé.

Yi kópu ndîi kópu. Yélini y:oo yi pye mî yoo a chââchââ tumo, yi yéli ye nmî Mî ngê ala kópu myedê vyyu, yepê, \*

<sup>3</sup> yed:oo mb:aamb:aa ngê anmyin:aa ya,

myenté dye ghi daadîi amyenmyin:aa ya.

<sup>4</sup> Mââ yoo, nmyi tp:ee dmââdîma yi p:uu ala kópu a ny:ee yó. Kîdmyengê nod:enod:e kalê t:oo, ngmênê mb:aamb:aa ngê ye dmyinê vyyuwo, nmî Lémi u kópu dyuu yi lama dmyinê kîgha dé, u l:êê ghi dmi mbêmê dêêpî ye myedmyinê yémî. \*

### *Wop dpodo pyu yoo yi danêmbum*

<sup>5</sup> Wop dpodo pyu yoo, n:ii knî y:oo wop a dpodo kîgha nmyo, yi dnye dmi dmyinê nyêmî dé, ye

---

\* **6:1:** Kîlosa 3:20    \* **6:2:** Ex 20:12    \* **6:4:** Kîlosa 3:21; Prov 22:6

myedmyinê nkîngê. Yesu Kédisu p:uu nuw:o ngmidi mbêmê ntee nmye dpodo té, nuw:o ngmidi mbêmê yinté yi p:uu myedmyinê dpodo. \*

<sup>6</sup> Nmyi kada pini yoo yi ngîma ntee nmye dpodo nyédi, yi kuwó yinté myedmyinê dpodo. Daa dyámê mbêmê tpémi yi ngîma nmye dpodo té, ngmênê Yesu Kédisu ngîma nmye dpodo té, dpodombiy:e p:uu dmyinê dpodo, nmî Mî u nuu u kópu dé dmyinê d:uud:uu dé.

<sup>7</sup> Nmyi mâawe knî yi p:uu dpodo tédê kîdmyengê nuu mbumu, ngmênê nmyi gha dmi mb:aamb:aa ngê dny:oo ya. Alanté dmyinê nuw:o, apii, Daa pi ngmê p:uu nmo dpodo té, nmî Lémi p:uu nmo dpodo té.

<sup>8</sup> Ala kópu nmyi lama choo ya, Pini n:ii ngê kópu mb:aa dpí d:uu, k:omo tpile yi pini u pi ndîi, ó u pi tédê, ngmênê nmî Lémi ngê yi kópu mb:aa u pywuu u kwo wa y:oo. \*

<sup>9</sup> Kada pini yoo, yélini wop nmye dpodo kîgha tumo, mb:aamb:aa ngê ye dmyiné vynuwo, namê nkîngê kîgha dé. Nmyi lama choo ya, nmyi dpodo pyu knî yi k:ii, nmyi kada pini mu ngmidi, mbóó p:uu wunê tóó. Yi pini daa kedekede pyu, kwodonkwodo ntênê wa kóté kalê nmo. \*

### *Setan u yoo knî yi p:uu lêê*

<sup>10</sup> A tidê mbwó yoo, nmî Lémi ngê u wêdêwêdê mbêmê choo a wêdêwêdê kîgha nmyo, mu kópu u dîy:o u kwo a kâadî nmyoo.

<sup>11</sup> Lede knî y:oo yi káped:ê ntee a tpyé tumo, kópuni yilî nmyi w:êêw:êê u lêê dîy:o nmî Mî ngê

\* 6:5: Kílosa 3:22-23; Taitas 2:9

\* 6:8: Kílosa 3:24-25

\* 6:9:

Kílosa 4:1

nmye a kê too, nmyi p:uu yinté myoo t:ee tóó, mu kópu u dîy:o Setan ngê kîngê dóó nmyo, myekîngê dyênê nmyo. \*

<sup>12</sup> Daa pi knî yi p:uu nmo l:êê té, ngmênê Setan p:uu nmo l:êê té, u dpodo pyu knî yi p:uu myeno l:êê té. Nyââ, kmêna mbwee nkwépi knî yi p:uu nmo l:êê té, yélini yi wêdêwêdê ndîi, myenté n:i knî y:oo mgîdî u kópu dé a d:uud:uu tumo, vyîlo yi yéli yi p:uu nmo l:êê té.

<sup>13</sup> Nyââ, kópuni yilî nmyi w:êêw:êê u l:êê dîy:o nmî Mî ngê nmye a kê too, nmyi p:uu dpî t:ee tóó, Setan u dpodo pyu yoo u ngwo pêdê t:ââ tóó. Dini ghi n:i ngê nmyi p:uu adnyi l:êê, wa dêê dmi, daawa dyênê nmyo, ngmênê p:ee wanmyi dyênê t:oo, yi pwo wanmyi lee dmi. \*

<sup>14-15</sup> Dpodombiy:e dmyinê vyyuwo. Lede knî y:oo yi kpîdî dmi knî yi pwo mbalêti dpî t:ee t:oo, yu dópo dmi yi yiyé dpî t:ee t:oo, nkichi pee yi yodo p:uu dpî t:ee t:oo. Nmyi w:êêw:êê u tpile dé nmyi p:uu yinté myoo t:ee tóó, dmyinê ndê danê, dmyinê mb:aamb:aa, dyââpe nmyi p:uu kîngmê ya, nmî Lémi u kópu dyuu u tpaê ngê u ntââ mbêmê dpî yaa dmyeno. \*

<sup>16-17</sup> Lede knî y:oo káped:ê a tpyé tumo, dîdî ka u ngwo dpî w:ono dmi, myenté yi mbodo dópó yi mbêmê dpî kaa t:oo, dpo, Taa ngê angmê vya nmo. Nmyi w:êêw:êê u l:êê dîy:o nmî Mbwámê ka dmyinê kélîmî, Setan ngê daapaa dyênê nmyine. Kópuni dyuu nmî Mî u Ghê Dmi ngê nmye wuné kuwo ngê, nmyi mênê choo ya, taa ntee tpile ngê

\* **6:11:** Njems 4:7; 1 Pita 5:8-9    \* **6:13:** 2 Kódin 10:4    \* **6:14-15:** 1 Tes 5:8; Is 40:9

nmye wa pyaa dmi. \*

18 Setan p:uu l:êê u l:êê dîy:o, dpodombiy:e dmyinê ngêpê. Nmî Mî u Ghê Dmi ngê choo a ngêêpî nmyo, dye ghi yintómu nmî Mî ka u ngwo dmyinê ngêpê. Kídmýengê kede dmi, dmyinê vyyuwo, dye ghi yintómu nmî Mî u yoo knî yi l:êê dîy:o myedmyinê ngêpê. \*

19 A l:êê dîy:o myedmyina a ngêpê. U ya a nga a kwo, Dini ghi n:ii ngê pi knî ye anî mbumu, nmî Mî ngê u kópu dyuu a ka pêdê vyi ngê. U ya a nga daa kwo, Ní nkîngê mb:anê, u ya a nga a kwo, Nmî Lémi u tumu kópu ntênê ye nî vyi. \*

20 K:omo tpile yi kópu dyuu u l:êê dîy:o mbwa k:oo n:aa kwo, ngmênê u ya a nga a kwo, Yi kópu dyuu pi knî ye nî vyi, daap:aa nkîngê mb:anê.

### *Póól u nd:uu tpapê*

21 Pini n:ii ngê ala pwepwee pee nmye wunê ñeñe, Tikikas, nmî Lémi ka a kêlîmî, mb:aamb:aa ngê p:uu mye dpodo. Yi pini a nuu u pi, a kópu yilí yintómu nmye yinê amînê nt:o. \*

22 Yi kópu u l:êê dîy:o nmye nînê dyede. Kópuni a nga a pyodopyodo té, nmyi lama pîdny:oo a ya, myenté Tikikas ngê nmyi nuw:o dmi yinê amí l:âmo té.

23 A tîdê mbwó yoo, nmî Mî mupwo y:oo nmyi kêlîmî ndîi ngê dpo pyódu y:e, mb:aamb:aa ngê nmye dny:oo a vyyuwo, myenté yoo yi nuu ghi dmi nmyi nódo dpo yé y:e.

\* **6:16-17:** Hipîlu 4:12      \* **6:18:** Luukî 18:1      \* **6:19:** Kîlosa 4:3-4

\* **6:21:** Kîlosa 4:7

24 Yélini yi k:ii nmî Lémi Yesu Kédisu u nuu ghi nmyi nódo a tóó, nmye mb:aamb:aa ngê choo a vwuwo, chedê ngê daawa pyódu.

Wu u dí. \*

---

\* 6:24: 1 Pita 1:8



**NMÎ MÎ U KÓPU DYUU**  
**The New Testament in the Rossel Language, also called**  
**the Yele Language, of Papua New Guinea**  
**Nupela Testamen long tokples Yele Rossel long Niugini**  
copyright © 1998 Wycliffe Bible Translators, Inc.

© 2011-2013 Wycliffe Bible Translators, Inc.

Language: Yele Rossel (Yele)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-11-03

---

PDF generated using Haiola and XeLaTeX on 18 Apr 2025 from source files dated 13 Dec 2023

f23d3065-5277-5598-adb2-6416a21ad128